

09-20 Hrs

Headlines

1. औंदी 25 सितम्बर गी प्रदेश च होने आले दुए गेड़ दे चुनां लेई प्रचार तेज होई गेआ ऐ। बक्ख-बक्ख सियासी पार्टिएं दे वरिष्ठ नेता प्रदेश च रैलियां ते जनसभां करै करदे न।
2. चुनाएं च हिस्सेदारी बारे लोकें गी जागरूक बनाने लेई जम्मू कश्मीर च स्वीप तैहत् केई गतिविधियां कीतियां जा'रदियां न।
3. राजौरी जिले च बुर्जुगें ते दिव्यांग मतदाताएं लेई उपलब्ध करोआई गेदी होम वोटिंग दी सुविधा दरान रिकार्ड 96.90 प्रतिशत मतदान दर्ज कीता गेआ ऐ।
4. प्रधानमंत्री नरेन्द्र मोदी होरें अमरीका दे डेलावेयर च क्वाड नेताएं दे शिखर सम्मेलन च हिस्सा लैता।

<><><><><><>

Campaigning

जम्मू कश्मीर च दुए गेड़ दे असेंबली चुनाएं लेई प्रचार होर तेज होई गेआ ऐ। इस गेड़ तैहत् औंदी 25 सितम्बर गी प्रदेश दे 6एं जिलें दे 26 विधानसभा हल्कें च वोट पोआए जाने न। बीजेपी दे वरिष्ठ नेता ते केन्द्री गृहमंत्री अमित शाह होरें कल पुंछ, राजौरी ते जम्मू जिले च 5 चुनावी रैलिएं गी संबोधत कीता। शाह हुंदा अज्ज उधमपुर ईस्ट हल्के च नौशहरा ते मजालता च चुनावी रैलियां करने दा कार्यक्रम ऐ। बीजेपी दे राष्ट्री प्रधान जे.पी.नड्डा होर अज्ज जम्मू च इक रोड शो करगंन ते दऊं जनसभाएं गी संबोधत करगंन। रक्षा मंत्री राजनाथ सिंह होर अज्ज ते औंदी 25 तरीक गी बी प्रदेश च जनसभाएं गी संबोधत करगंन। कांग्रेस नेता राहुल गांधी होर कल पुंछ ते श्रीनगर च चुनावी रैलिएं च भाषण देंगन। नैशनल कांफ्रेंस दे प्रधान ते जम्मू कश्मीर दे साबका मुख्मन्त्री डॉ. फारूक अब्दुल्ला होर मेद ऐ जे कल जैनाकोट च इक चुनावी रैली करगंन। प्रधानमंत्री नरेन्द्र मोदी होर औंदी 28 सितम्बर गी जम्मू च इक चुनावी रैली गी संबोधत करगंन। एह रैली ओह पैहली अक्तूबर गी असेंबली चुनाएं दे त्रीये गेड़ तैहत् जम्मू सांबा ते कटुआ दे 20 मेदवारें लेई सांझे तौर पर करगंन। असेंबली चुनाएं गी दिक्खदे होई जम्मू कश्मीर च मोदी हुंदी एह चौथी रैली होग। एहदे शा पैहले उनें डोडा, श्रीनगर ते कटड़ा च रैलियां कीतियां।



## SVEEP Rajouri

स्वीप गतिविधिएं दे इक हिस्से दे तौर पर राजौरी दे डूंगी ते नौशहरा च बाइक ते कार रैली दा सरिस्ता कीता गेआ। जागते दे सरकारी हायर सकेँडरी स्कूल नौशहरा थमां इक रैली शुरू होई जेहड़ी कब्जा रेखा कश जाइयै सम्पन्न होइ गई। इनें रैलिएं दा मकसद आम लोकें च खास करी चुनाएं ते महिलाएं च मतदान गी लेई जागरूकता पैदा करना ऐ। इस हल्के च 25 सितम्बर गी विधानसभा चुनाएं दे दुए गेड़ तैहत मतदान होना ऐ। इस जतन दी मकामी लोकें बड़ी मती सराहना कीती। राजौरी जिले च लोकतंत्र गी मजबूत करने आली भेठा एह इक टकोहदी गैह ऐ।



## SVEEP Udhampur

ओंदे विधानसभा चुनाएं दरान मतदाताएं दी शमूलियत गी बघाने दे मकसद कन्नै उधमपुर दियां जिला चुनां अधिकारी सलोनी राय होरें स्वीप तैहत नेकां गतिविधियां शुरू कीती दियां न। इंदे तैहत गै 2 बड्डे बड्डे गुब्बारे लाए गेदे न। एह महत्वपूर्ण थाहरे पर लाई गेदी ऐ तां जे सारें गी एह नजरी औन। इंदे पर मतदान च हिस्सा लैने बारे सनेह बड्डे बड्डे अखरें दा लिखे गेदे न। इसगी आम लोकें दी खरी प्रक्रिया थोआ'रदी ऐ।



## Home Voting

राजौरी जिले च घरे थमां मतदान करने आली प्रक्रिया च 96.90 फीसदी लोकें मतदान कीता। घरे थमां मतदान करोआने आले जतन तैहत वरिष्ठ नागरिकें ते दिव्यांग मतदाताएं आस्सेआ वोट पाए गे। जिला चुनां अधिकारी अभिषेक शर्मा हुंदी हिदायतें मूजब 150 मतदान टीमें गी जिले च इस कम्मै पर लाया गेदा हा। इस गैह दा मकसद ऐ जे कोई बी मतदाता वोट पाने दे अपने अधिकार थमां वंचित नेई रौहना लोडचदा। 85 ब'रे थमां बद्ध दी उमरी आले इक जहार 615 मतदाता ते 744 दिव्यांग मतदाताएं लेई एह पूरी प्रक्रिया जिले च चलाई गई।



## DEO Reasi

रियासी दे जिला चुनां अधिकारी विशेष महाजन ते एसएसपी गौरव होरें नीम फौजी बल, पुलस ते जिला प्रशासन दे वरिष्ठ अफसरें कन्नै बैठक लाई ते विधानसभा चुनां गी दिक्खदे होई नियम कायदे लेई गलाया। इस दरान सुरखा सरबंधी तौर तरीके पर बी चर्चा कीती गई। बैठक दरान जिला चुनां अधिकारी होरें मजूदा सुरक्षा सरबंधी तैआरिएं, कनून बवस्था, निगरानी ते चुनां तैआरिएं बारे चर्चा कीती। आम निगरान एवी प्रसाद होरें इस दरान पेशेवराना रौह सरबंधी कार्य योजना ते नियम अपनाने पर जोर पाया। उनें जिले दे दूर दरेड़े इलाकें च सुरक्षा बंदोबस्त बनाई रखने दी महत्ता गी उजागर कीता।

<><><><><><>

## Poonch Polling Station

पुंछ दे जिला चुनां अधिकारी विकास कुंडल होरें सुरनकोट, मेंढर ते हवेली विधानसभा हल्के आस्तै पिंग पोलिंग स्टेशनं दा दौरा लाया। जिला नोडल अफसर बी इस दरान उंदे कन्नै मजूद हे। उनें कुड़िएं दे हायर सर्केंडरी स्कूल सुरनकोट, जागतें दे हायर सर्केंडरी स्कूल मेंढर ते हवेली च बाल आश्रम दा दौरा लाया। जिला चुनां अधिकारी होरें इने सारे मतदान केन्द्रें च जायजा लैता। इने पिंग मतदान केन्द्रें पर महिला अमला लाया गेआ ऐ। चुनां आयोग नै चुनां प्रक्रिया च महिलाएं दी शमूलियत जकीनी बनाने लेई एह जतन शुरू कीता ऐ। महिलाएं दा सशक्तिकरण बी इस गैह दा मकसद ऐ। इस हल्के च 25 सितम्बर गी मतदान होना ऐ।

<><><><><><>

ते हुन बाकि दिएं खबरें कन्नै श्रुति खजूरिया।

<><><><><><>

## PM-Modi

प्रधानमंत्री नरेन्द्र मोदी होरें आखेआ जे क्वाड हिंद-प्रशांत क्षेत्र गी आजाद मुक्त, समावेशी ते समृद्धबनाई रखने लेई वचनबद्ध ऐ। अमरीका दे डेलवेयर च क्वाड शिखर सम्मेलन च उनें आखेआ जे एह आयोजन नेह समें होआ'रदा ऐ जिसलै दुनिया तनाह ते मुसीबतें दा सामना करा'रदी ऐ ते एह बड़ा मता जरूरी ऐ जे क्वाड देश सांझे लोकतांत्रिक मूल्य गी ध्यानै च रखदे होई मनुक्खता लेई किट्ठे रलियै कम्म करन। प्रधानमंत्री होरें एह बी आखेआ जे क्वाड समूह कुसै दे खलाफ नेई ऐ ते हर नियम आधारित अंतर्राष्ट्रीय बवस्था, सप्रभुता क्षेत्रीय अखंडता ते सब्बने मुद्दें गी शांतिपूर्ण तरीके कन्नै नबेड़ने दे पक्ख च ऐ। उनें आखेआ जे समृद्ध हिंद-प्रशांत क्षेत्र गी स्वतंत्र, मुक्त ते समावेशी बनाना क्वाड मुल्लखें गी प्राथमिकता ऐ।

<><><><><><>

## Encounter

किश्तवाड़ जिले दे जंगली इलाके च सुरक्षा बलें ते आतंकवादिएं बश्कार कल संजा टाकरा भखी पेआ। एह टाकरा उसलै शुरू होआ जिसलै इलाके च आतंकवादिएं दी मजूदगी बारे थहोई दी इक टकोह्दी सूह पर कारवाई करदे होई सुरक्षाबलें इलाके च तपाशी अभियान रंभ कीता। टाकरे शुरू होने मगरा बाद्दू नफरी गी भेजेआ गेआ ते होर मती जानकारी गी बलगेआ जा'रदा ऐ। तोआई रियासी जिले दे चसाना इलाके च व्यापक तपाशी अभियान जारी ऐ। इत्थें शुक्रवारे संजा आतंकवादिएं ते सुरक्षाबलें बश्कार गोलीबारी होई ही।

<><><><><><>

## Advisory Tobacco

केन्द्र सरकारै नोजवानें आस्सेआ तम्बाकू छिक्कने दी समस्या कन्नै निबड़ने लेई राज्यें ते केन्द्र शासत प्रदेशें गी सलाह जारी कीती ऐ। एहदे च केन्द्री शिक्षा मंत्रालय ते सेहत ते परोआर कल्याण मंत्रालय नै राज्यें ते केन्द्र शासत प्रदेशें दे मुख् सचिवें गी तम्बाकू मुक्त शैक्षणिक संस्थाने दे सरबंधै च दिशा-निर्देशें दी असरदार अमलावरी लेई आखेआ। एहदा लक्ष्य तम्बाकू दे माड़े असर दे बारे च जागरूकता फैलाने दे कन्नो कन्नी तम्बाकू नियंत्रण उपाएं गी बढ़ावा देइयै भविक्ख दिएं पीढ़िं दी हिफाजत करना ऐ। इस सर्वेक्षण च पता लग्गा ऐ जे भारत च 13 थमां 15 ब'रें दी उमरी दे साढ़े 8 फीसदी स्कूली बच्चे तम्बाकू छिक्कदे न।

<><><><><><>

## Chief Justice

जम्मू कश्मीर ते लद्दाख सनें मुख् दे 7 हाई कोर्टे च नभें मुख् न्यायधीशें गी नियुक्त कीता गेआ ऐ। सुप्रीम कोर्ट दे कोलेजियम आस्सेआ 11 जुलाई आली अपनी किश सफारशें च संशोधन मगरा एह नियुक्तियां कीतियां गेइयां न। जम्मू कश्मीर ते लद्दाख हाई कोर्टे दे जस्टिस ताशी राबस्तन होरें गी जम्मू कश्मीर ते लद्दाख होई कोर्टे दा मुख् न्यायधीश नियुक्त कीता गेआ ऐ। जस्टिस राबस्तन होर लद्दाख खित्ते थमां मुख् न्यायधीश बनने आले पैहले न्यायमूर्ति न। लद्दाख थमां अजें तगर कोई बी जस्टिस मुख् न्यायधीश दे औहदे तगर नेई पुज्जे दा ऐ।

<><><><><><>